

Carta chí ivi nacahyí Pablo nuú na cúu cuéntá Jesús ndúu ñuu Corinto

Cáhan Ndióxi Pablo xihín na cúu cuéntá Jesús ndúu ñuu Corinto

1 Yehe cúu Pablo, da nacaxi Ndióxi cacuu apóstol cuéntá Jesucristo jáchi já cúní a caja. Yehe xihín ñaní, Timoteo cáhyí nde carta yóho nu ndóhó, na cúu cuéntá Ndióxi ndúu ñuu Corinto ta nu tóco ndihi na cúu cuéntá Ndióxi ndúu estado Acaya. ²Ña cúní quéa ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

Ndóho ini Pablo

³Cóho caja cáhnu í Ndióxi, mé a cúu tátá xitoho í, Jesucristo. Jáchi Ndióxi cúu á tátá yo, mé á sá tahví ini saha yo ta cúu á Ndióxi ña chindeé mí tá ndóho iní. ⁴Mé a cán sahan tuhun ndeé iní nu tóco ndihi ña ndóho iní já quéa ná cuu caja ri mé ví quiahva í tuhun ndeé ini ñayivi tá ndóho ini na. Tá quiahva cája mé á xoho quiahva já ndítahan caja í xihín ñayivi. ⁵Jáchi tá quiahva ndóho ndivaha iní saha Jesucristo ta sa mé quiahva já sahan cuahá ndivaha mé á tuhun ndeé iní tá ndóho iní. ⁶Tá ndóho ini mé nde já cuu quixi tuhun ndeé ini mé ndó ta já cuu cacu ndaa ínima ndo. Tá sahan Ndióxi tuhun ndeé ini nde já quéa sahan ri mé á tuhun ndeé ini mé ndó viti. Ta xihín ña yóho cuu coo ndacú vaha ini ndó tá ná quixi ña ndoho ini ndó tá quiahva ndóho ini mé nde. ⁷Cándeé ini nde ña a jándacoo ndó tuhun Ndióxi jáchi cándaá cáxí ini nde ña tá quiahva ndóho iní quiahva já sahan Ndióxi tuhun ndeé iní.

⁸Candehé ndó, ñani i, na cúu cuéntá Jesús. Cúní nde caxi tuhun nde nu ndo tá quiahva nandoho ini nde estado Asia. Nasacuu a tondóhó chichánu nuú nde ta chí a cándeé ga ini nde nacahán nde, nduu. Ta chí nasahnda ini nde: “Yóho quiví”, nacahán nde. ⁹Nacahán nde ña jandá ndátí cuití nde quiví nde joo nachindeé ña yóho ndehe jáchi náha nuú nde ña co ndítahan candeeé ini nde mé nde. Jáchi ña ndítahan candeeé ini nde cúu Ndióxi, mé a jánditacu tucu ndii. ¹⁰Najácacu Ndióxi ndehe tañu tondóhó ná a quiví toho nde. Ta mé á quéa jácacu a ndehe nuú ndihi tondóhó vaxi chága chí

nuu. Jáchí cándee ini nde mé á ña chindee tá chindee a ndehe nuú ndihi tondóhó. ¹¹Ta mé ndó chindee ndó ndehe tá xíca tahví ndó nu Ndióxi sahá nde. Jáchí tá ná caca tahví cuahá ñayivi nu Ndióxi sahá nde, sa mé quiahva já ndiquiahva cuahá ñayivi ndixahvi nu Ndióxi sahá ñamani cája Ndióxi xihín nde.

Ndícani Pablo ndá saha quéa coó nasahan da ñuu Corinto

¹²Íin java ñaha cája ña ná coo vaha ini nde ta cúú á ña yóho: cándaa cáxí ini nde ña co cája nde ña núu ta tóco ndihi ña cája nde ñuyíví yóho cája nde ña xihín ndinuhu ini nde. Ta xihín ndinuhu chága ini nde cája nde ña cán tañu mé ndó. Ta ni in ña cája nde co cája nde ña sahá ña ndíchí quixi jini mé nde jáchí mé Ndióxi quéa táhvi ini sahá nde ta chindee a ndehe cája vaha nde. ¹³Tá nacahyí nde carta nu ndo jihna coó nacahyí nde tuhun ña a cuú candaa ini ndó jáchí ndacú ndacú cáhan nde xihín ndo nu carta cáhyí nde. Jáchí cúni nde ña ná candaa vaha ini ndó ¹⁴ña co cándaa cuahá ini ndó viti. Ta cúni nde ña ná cajii ini ndó saha mé nde tá quiahva cajii ini nde saha ndo tá ná tandaa quiví quixi tucu Jesucristo ñuyíví yóho.

¹⁵Sahá ña cándee ini i ndohó sahá ña cán quéa nasacu ini i coto nihni jihna ñúhú i ndohó ña ná cajii ndivaha ini ndó tá ná cuni ndó yehe ivi tañu. ¹⁶Jáchí nasacu ini i coto nihni i ndohó tá ná yaha i cuhun i chí estado Macedonia ta já coto nihni tucu u ndohó tá ná ndicó coo i cán. Anda já cuu chindee ndó yehe quehé e íchí cuhun i chí estado Judea. ¹⁷Coto a cáhán ndo ña nacahvi ivi joho ini i tá nasacu ini i caja i ña yóho. Ta ni a cáhán ndo ña sácú ivi joho ini i xihín ña cája i tá quiahva cája ñayivi ñuyíví jáchí ndá chuun quéa cáchí i jivi a tá a juú a. ¹⁸Sándehe cáxí Ndióxi ña co jándahvi nde ndohó jáchí co cáchí nde xihín ndo “ajan” tá cúni cachi nde “uhun.” ¹⁹Jáchí co cája Jesucristo já. Co cáchí a “ajan” tá cúni a cachi a “uhun.” Ndinuhu ña ndaa quéa cáhan Jesucristo jáchí mé á cúú á in túhún jini já jahyi Ndióxi, mé a cáhan Timoteo xihín Silvano xihín yehe sahá nu ndo. ²⁰Jáchí xihín Jesucristo jáxinu coo Ndióxi tóco ndihi tuhun nasahan mé á nu yo. Sahá ña cán quéa tá cája cáhnu í Ndióxi cuu cachi yó “Já ná coo.” Ta tá cáchí yo “Já ná coo” cúú á sahá ña nacaja Jesucristo. ²¹Ta mé Ndióxi nandaja ndacú a ndehe ta nandaja ndacú a ndohó. Ta nacaxi a mí cacuú ñayivi cuéntá mé á. ²²Jáchí mé á cúú á xitoho mí ta cómi a cuéntá saha yo. Ta nasacu a ínima yii mé á ini ínima yo já ná candaa vaha iní ndá quiahva íin ñamani caja Ndióxi xihín yo chí nuu.

²³Sándehe cáxí Ndióxi ña mé a ndaa táhyí cáhan i xihín ndo. A ñaha saa i ñuu Corinto jan tá quiahva nasacu ini i caja i jáchí co cúni jácacuéha i ini ndó. ²⁴Co cúú á sahá ña cúni nde caja ndúsa nde sahá ña ndítahan

candúsa ndó. Jáchí sa xíní nde ña sa ndúu ndacú ndó cándée ini ndó Jesucristo. Ña cúní nde quéa chindeé táhan nde xihín ndo já ná cajíi ini ndó.

2 Sahá ña cán quéa nasacu ini i ña ná a cúhun tucu u coto nihni i ndohó já ná a cácuéha ini ndó. ²Jáchí tá ná jácacuéha yehe ini ndó a cúu caja ndó jácajii ndó ini i jáchí mé ndó cúu ná jácajii ini i. Joo ndaja caja ndó jácajii ndó ini i tá sa najácacuéha i ini ndó. A cúu caja ndó ña. ³Sahá ña cán quéa nacahyí i in carta ña nachindahá i nu ndo cán jáchí co cúní xinu i jan ta jácacuéha ndó ini i sahá ña cája ndó. Jáchí ndítahan jácajii ndó ini i nani íin i xihín ndo. Jáchí xíní vaha i ña tá cájii ini i já cájii ini ri ndóhó va. ⁴Joo nani nacahyí i mé carta cán já nacasáhá táhvi ini i ta ndícani ini i janda quiahva nacasáhá sácu u. Coó nacahyí i ña sahá ña cúní ña ná catati ini ndó xihín á joo cúní ña ná candaa ini ndó ndá quiahva quíhvi ndivaha ini i ndohó.

Ndítahan caja cáhnu ini na ndúu ñuu Corinto sahá in da nacaja cuachi

⁵Ta mé da nacaja cuéha ini i cán coó nacaja cuéha da ini in túhún yehe tá nacaja da cuachi. Joo cúu á tátuhun nacaja cuéha ri da ini ndihi ndó. Cáhan i ña yóho xihín ndo ña ná a jánani ndivaha ndó da. ⁶Jáchí cuaha ndó sa najánani ndó da cán. Vati já va caja xíxi ndó xihín dá. Ndáhvi da. ⁷Ña ndítahan caja ndó quéa caja cáhnu ini ndó saha dá viti ta quiahva ndó tuhun ndeé ini da jáchí a juú tiaha náa cacuéha ini da xihín ña cája ndó xihín dá. ⁸Sahá ña cán quéa xíca táhvi tucu u nu ndo ña ná jánaha ndó nu dá ña mé a ndaa quíhvi ini ndó da. ⁹Sa nacahyí vi in carta nu ndo nu ndícani i sahá ña yóho. Nacahyí i ña sahá ña nasacu ini i coto ndojó i ndohó á mé a ndaa táhyí cája ndó tá íin nacachi i xihín ndo. ¹⁰Ña cán quéa ndá na ná caja cáhnu ini ndó saha já caja cáhnu ri ini yehe va saha ná. Ta tá íin in ñaha ndítahan caja cáhnu ini i saha já quéa cája i ña saha mé ndó. Ta sándehé cáxí Jesucristo ña cája i. ¹¹Jáchí tá ná a cája í ña já quéa cándée tiñáhá sacuaaha xihín yo jáchí sa xíní vaha í ña cúní rí jándahvi rí ñayivi.

Ndícani ini Pablo nani íin da ñuu Troas

¹²Tá naxinu coo i ñuu Troas ña caxi tuhun i tuhun vaha saha Jesucristo já nanuná nuú i caja chúun vaha i cuéntá mé á cúu xitoho í. ¹³Joo coó nasahíin vaha ini i jáchí coó nañehé e ñaní Tito. Sahá ña cán quéa nandindayí i ñaní, na ndúu ñuu Troas já naquee e cuahan i chí estado Macedonia ndinducú u da.

Sáhan Jesucristo ndée á nu yó quee vaha í

¹⁴Ndíquiahva i ndixahvi nu Ndióxi jáchí sahá ña nacaja Jesucristo quée vaha í nít tiempo. Tá quiahva ndícuíta nuu in jico támi sahan quiahva já

ndícuíta nuu tũhun Ndióxi cája nde já quéa ná cuu candaa ini ñayivi tũhun vaha saha Jesucristo. ¹⁵Jáchĩ mí cúú yó tátũhun jusa vaha ña támi sahan ña jóco Jesucristo nu Ndióxi. Ta ndícuíta nuu a tañu na jácacu Ndióxi sahá ña cándeé ini na mé á. Ta jári ndícuíta nuu a tañu na cũhun indayá sahá ña coó nacandúsa na mé á. ¹⁶Mí cúú yó tátũhun jusa támi sahan nuú na sa cándaa ini tũhun Ndióxi jáchi xínĩ na ñéhe yó tũhun ña cuu jácacu ínima ná. Ta nuú na co xínĩ tũhun Ndióxi cúú yó tátũhun in ña quini ndivaha sahan jáchi cũhun na indayá. Ndá na cúú caja jáxinu ini ñayivi, da já. ¹⁷Jáchĩ xínĩ Ndióxi ña mé nde co xíca nuu nde cáhan nde tũhun Ndióxi sahá jiuhún ta co jáma nde ña tá quiahva cája cuahá ñayivi. Ña cája nde quéa cáhan nde xihín ñayivi xihín ndinuhu ini nde ña sahan Ndióxi nuú nde cahan nde. Jáchĩ mé nde cúú nde na nachindahá Ndióxi ta cája chúun nde saha Jesucristo.

Cáxi tũhun Pablo sahá tũhun saá ña sahan Ndióxi nuú ñayivi

3 Co cáhan nde ña yóho xihín ndo sahá ña cúni nde caja cáhnu nde mé nde. Jáchĩ co xínĩ ñúhú nde caca nde in tutu ña cáchĩ cúú nde ñayivi ndísáhnu ini nu ndo tá quiahva cája java na. ²Mé va ndó cuu quiahva ndó tũhun vaha sahá nde jáchi tá ná cuni ñayivi tá quiahva nandijama Ndióxi ínima ndo xihín tũhun nacahan nde xihín ndo já candaa ini na ña nacaja vaha nde tá nacaja chúun nde tañu mé ndó. ³Jáchĩ náha cáxĩ táhyí a ña cúú ndó tátũhun in carta nacahyí Jesucristo ta mé nde jánaha nde ña nuú ñayivi. Co cúú á in carta nacahyí nuú tutu. Cúú á ña nacahyí ínima yíi Ndióxi, mé a tácu indiví. Ta cúú á in carta ña coó nacahyí nuú yuu jáchi cúú á tátũhun nacahyí a ini ínima ñayivi.

⁴Ta cáhan nde ña yóho jáchi cándeé cáhnu ini nde Ndióxi sahá ña nacaja Jesucristo. ⁵Co cúú á sahá ña quíxi jini mé nde cája nde ña. Jáchĩ Ndióxi quéa sahan ndeé á nuú nde caja nde chuun yóho. ⁶Ta mé á quéa chindeé ndehe caja chúun nde cuéntá mé á xihín cuéntá tũhun saá nasahan nu yo. Co cája chúun nde saha ley nacahyí nuú tutu joo cája chúun nde saha ínima yíi Ndióxi. Mé ley cája ña ná quivi ñayivi joo cája ínima yíi Ndióxi ña ná catacu ñayivi anda ama cáa quívi.

⁷Tá nacahyí ley Moisés nuú yuu, já nandiyehẽ ndivaha nuu Moisés janda quiahva coó nacuu ga candehé na Israel nuu dá. Joo nuú nandiyehẽ nahá cán nacasáhá ndáhva ña janda quiahva nandahva ña. Candehé ndó. Vatí nandiyehẽ ndivaha nuú naquixi mé ley, ña cuu chindahá ñayivi cũhun na indayá ⁸joo ndaja ga ví ndiyehẽ chága nuú quixi tũhun vaha cáhan saha Jesús nuú ñayivi jáchi sahan ínima yíi Ndióxi tũhun yóho nu yo. ⁹Candehé ndo. Vatí ndató nasahiin tá naquixi mé ley ña cuu chindahá ñayivi indayá joo ndaja ga ví ndató coo tá cáxi tũhun í xihín ñayivi ña coó ga cuachi na

nu Ndióxi. ¹⁰Jáchì coó sahá ga ña ndató mé ley naquixi jihna cán tá ná jácatáhan í ña xihín ña ndató chága nasahan Ndióxi nu yó viti. ¹¹Ta tá ndató nasahiin nuú naquixi ña nandihi saha cán ndaja ga ví ndató chága coo ña sahan Ndióxi nu yó yóho jáchì a ndíhi toho sahá.

¹²Ta sahá ña ndátì tiahva nde coo ña yóho sahá ña cán quéa co yíhví nde cáhan nde ña xihín ñayivi. ¹³Co cája nde tá quiahva nacaja Moisés tá nachijahvi da nuu dá xihín in jáhma ña ná a cúní na Israel ña sa cuahan ndáhva ña nandiyehé nuu dá cán. ¹⁴Joo mé na Israel cán coó nacandaa ini na ndá cuéntá quéa nachijahvi Moisés nuu dá. Ta janda viti ndájí yíi xíní túní ná jáchì vatí cáhvi na tühun Ndióxi ña nacahyí sanahá joo co cándaa ini na ña jáchì najahvi xíní túní na ta a cúu nuná. Jesucristo cuití va cuu jándinuna xíní túní ná tá cándéé ini na mé á. ¹⁵Mé na Israel ndájí yíi xíní túní ná janda viti jáchì tá cáhvi na ña nacahyí Moisés co cándaa ini na ña. Cúu ná tátuhun in na jáhvi jáhma nuu. ¹⁶Joo tá ná ndicó coo ini ñayivi nu Ndióxi já ndinuna xíní túní ná. Cúu á tátuhun ndicava jáhma nasandaji nuu ná. ¹⁷Jáchì ínimá yíi Ndióxi cúu á xitoho í. Ta nu íin mé á, cán núná xíní túní ñayivi. ¹⁸Ta viti cúu yó tátuhun in yutátá nuu cuu cuni ñayivi tá quiahva cáhnu cúu Ndióxi. Jáchì co ndájí ga xíní túní yó viti sahá ña nacasáhá ndíjama Ndióxi mí viti ná nduú tá quiahva cáa Jesucristo. Ta tá quiahva cáhnu cúu mé á quiahva já loho loho nduu cáhnu yó tá quiahva cáa mé á. Já cája xitoho í, mé a cúu ínimá yíi Ndióxi.

4 Sahá ña cán quéa íin ndacú ini nde cáhan nde tühun Ndióxi xihín ñayivi jáchì sahá ña natahvi ini Ndióxi sahá nde sahá ña cán quéa nasahan mé á chuun yóho nuú nde. ²Mé nde nasacu xóo nde tóco ndihi ña núu cája jehé ñayivi. Ta co sácú ini nde jándahvi nde ñayivi tá cáhan nde tühun Ndióxi xihín ná. Ña cája nde quéa cáhan nde ndinuhu ña ndaa ta xihín ña yóho sándehé cáxí Ndióxi tá quiahva náha nde nuú ñayivi ña cája nde ña vaha. ³Tá co cándaa ini ñayivi tühun vaha sahá Jesús ña cáhan nde xihín ná, cúu á sahá ña xíca na íchì cuahan indayá. ⁴Jáchì sahá ña co cándúsa na ña cáhan nde xihín ná sahá ña cán quéa nandaji xíní túní ná nacaja tiñáhá, mé rí cúu xitoho ñuyíví yóho ña ná a cúní na ndá quiahva ndató ndíyehé tühun vaha cáhan saha Jesucristo, mé a cáhnu ndivaha, mé a cúu á yuhú nuu Ndióxi. ⁵Mé nde co xíca nuu nde cáhan nde saha mé va nde. Ña cája nde quéa xíca nuu nde cáhan nde saha Jesucristo, mé á cúu xitoho í. Ta cáhan nde xihín ndo ña cája chúun nde nu ndo sahá ña cúní nde Jesús. ⁶Jáchì nasahnda Ndióxi chuun ña ná queta ña yéhe tañu ña naá cán. Ta mé a cán quéa nacaja ña ná ndiyehé ínimá yó xihín tühun Ndióxi já quéa ná cuu candehé yó ndá quiahva yéhe nuu Jesucristo, ña náha ndá quiahva cáhnu cúu Ndióxi.

Ndá quiahva cuu canduú tá cándée iní Jesucristo

⁷Joo tóco ndihi ña ndáyahvi ña nasahan Ndióxi nu yo yóho cúu á ña ndácaan yiquí cuñu í vatí yiquí cuñu í cúu á tátuhun in quiji ndahyi. Nasahan Ndióxi ña ndáyahvi nu yo já queá ná cuu cuni ñayivi ña ín ndée Ndióxi cája tóco ndihi ñaha ta co cúu á ndée mí. ⁸Ta vatí vaxi cuahá tondóhó nu yo joo jáyaha tá jáyaha Ndióxi mí. Ta vatí ndicani ndivaha iní joo co jándihi nahá yo mí. ⁹Ta vatí ndícuíta ñee na mí joo co jándacoo ndáha toho Ndióxi mí. Ta vatí jándicava na mí joo co jándihi na sahá yo chí uun. ¹⁰Ta ndá nacuu nu xíca nuu í a íhvi toho cahní na mí tá quiahva nacaja na xihín Jesús. Ta xihín ña ndóho yiquí cuñu í náha ña tácu yii va Jesucristo ta ín a xoho. ¹¹Jáchí ndijáá ní quivi ndúcú na cahní na mí sahá Jesucristo. Joo xihín ña yóho núná nu yo jánaha í nuú ñayivi ña ndácaan ndée mé á ini yiquí cuñu í nani ndúú ñuyíví yóho. ¹²Ta sahá ña xíca nuu nde cáhan nde tuhun Ndióxi xihín ndo sahá ña cán queá ndúcú na cahní na ndehe. Joo sahá ña ndóho ini nde yóho cuu cacu ndaa ínima ndóhó anda ama cáa quivi.

¹³Jáchí já cáchí tuhun Ndióxi: “Sahá ña nacandée ini i Ndióxi sahá ña cán queá nacahan i cuéntá mé á.” Ta quiahva já cája ri ndehe va sahá ña cándée ini nde Ndióxi. Ña cán queá co yíhvi nde cahan nde saha mé á nuú ñayivi. ¹⁴Jáchí cándaa cáxí ini nde ña tá quiahva najánditacu Ndióxi Jesucristo, xitoho í quiahva já jánditacu a mí coo í xihín mé á. Ta já ndóhó xihín ndehe xinu coo í nu ín mé á. ¹⁵Nasacu ini Ndióxi ndoho ini nde tóco ndihi ña yóho saha mé ndó. Ña cán queá tá ná caha Ndióxi cuahá ñamani xihín cuahá chága ñayivi já nduu cuahá na ndiquiahva ndixahvi nu á ña ná ndicáhu mé á.

¹⁶Sahá ña cán queá co cáta ini xihín ña ndóho í vatí sa cáyatá yiquí cuñu í. Joo ndíyuta iní in in quivi yáha. ¹⁷Cama chá yáha tóco ndihi ña válí ndóho ini ñuyíví yóho joo tá nandihí nandoho iní já vaxi cuahá ndivaha ña náhu chága cuéntá mé á nu yo ta anda ama cáa quivi a ndíhi sahá. ¹⁸Ta co ndítahan nu yo quehé cuéntá sahá ña sándehé yó viti. Ña ndítahan caha í queá cahvi iní sahá ña a cuú cuní xihín nuu yo. Jáchí vaxi quivi ndihi saha tóco ndihi ña sándehé yo viti joo ña a cuú cuní coo a anda ama cáa quivi.

5 Jáchí sa cándaa iní ña cúu yiquí cuñu í tátuhun vehe nu ndácaan ínima yo. Mé vehe nu ndácaan ínima yo yóho cúu á ña vaxi quiví ndihi sahá. Ta anda jáví nasacu ini Ndióxi quiahva nu yo inga yiquí cuñu nuú coo ínima yó indiví. Ta mé nuú coo ínima yó cán a ndíhi sahá anda ama cáa quivi jáchí nacavaha Ndióxi ña. ²Nani ndácaan ínima yó yiquí cuñu í yóho já ndóho iní ta tána í jáchí xíca quí iní ndiquehé inga tucu

yiquí cuñu saá cuéntá indiví. ³Jáchì jácandixi Ndióxi mí xihìn yiquí cuñu saá cuéntá indiví já ná a cácuú tátuhun na coó jáhma. ⁴Jáchì nani ndácaan ínima yó ini yiquí cuñu í yóho tána í ta táhnda iní vatí co cúú á sahá ña cúnì yó jándacoo í yiquí cuñu í. Cúú á sahá ña ndiáva cáhnu iní coo ínima yó ini in yiquí cuñu saá. Anda jáví jándacoo í yiquí cuñu í ña ndíhí saha ta ndiquehé yiquí cuñu saá ña cuu cañehé anda ama cáa quivi. ⁵Jáchì mé Ndióxi quéa nasacu tiaha mí ndiquehé in yiquí cuñu saá jáchì mé á quéa nasahan ínima yìí á nù yó já ná canda vaha iní ndá quiahva ín ña sácú ini Ndióxi quiahva nù yó chí nuu.

⁶Sahá ña cán quéa ín ndeé iní jáchì cánda iní ña nani ndácaan ínima yó yiquí cuñu í yóho ndúu xíca yó nù Jesucristo, xitoho í. ⁷Ta vatí co xínì yó mé á joo xíca í íchì cuéntá mé á sahá ña cándeé iní mé á. ⁸Ta co yíhvi ga yó quiví viti jáchì cúnì chága í jándacoo í yiquí cuñu í yóho já ná cuu cohó coo í xihìn Jesucristo, xitoho í indiví. ⁹Sahá ña cán quéa níí tiempo ndúcú yó caja í ña táhán ini mé á xihìn. Vatí tácu yó á naxihì yó cúnì tá cúnì yó cája í ña táhán ini mé á xihìn. ¹⁰Jáchì vaxi quiví tá ná ndique táhan ndihí candita í nuú Jesucristo ndiquiahva tá in tá in í cuéntá nù mé á sahá ña nacaja í xihìn yiquí cuñu í ñuyíví yóho, á cúú á ña vaha á cúú á ña núu.

Nandique táhan mánì yó xihìn Ndióxi sahá ña nacaja Jesucristo

¹¹Cája cáhnu í Jesucristo xihìn ndinuhu iní ta cánda iní ña vaxi quiví cohó candita í nù mé á. Sahá ña cán quéa ndíhi ini nde jácahan nde ñayivi ña ná ndicó coo ini na. Ta xínì vaha Ndióxi ña cája nde ta cúnì nde ña ná canda ini ri mé va ndó ña. ¹²Ña cáhan nde yóho co cúú á sahá ña cúnì tucu nde ndínehe jícó nde mé nde. Ña cúnì nde quéa ná coo vaha ini ndó xihìn ña cája nde já ná cuu nducú ñehe ndó tuhun nuú na xíca ndínehe jícó mé, na xíca cáhan lándá ta coó ña vaha quíxi ínima ná. ¹³Vatí cúú nde na tachì nuú ñayivi joo cúú á sahá ña cája nde chuun Ndióxi. Ta tá co cúú nde na tachì já quéa cúú á sahá ña vaha mé ndó. ¹⁴Ta sahá ña quíhvi ini Jesucristo ndehe sahá ña cán quéa ndúsa cája nde ña cúnì mé á. Jáchì cánda cáxì ini nde ña naxihì Jesucristo saha tóco ndihì ñayivi ta in nanduú xihìn Jesucristo tá naxihì a. ¹⁵Naxihì Jesucristo saha tóco ndihí ña ná a catacú ga í saha mé cuití yó. Joo cúnì a ña ná catacú saha mé a naxihì saha yó ta tá nandihì nanditacu tucu a. ¹⁶Sahá ña cán quéa co sándehe ndaa ga nde ñayivi tá quiahva cája ñayivi ñuyíví. Vatí nacahan núu nde saha Jesucristo sanahá joo co cája ga nde já viti. ¹⁷Jáchì tá in nanduú xihìn Jesucristo já nanduú tátuhun ñayivi saá. Ña cán quéa nandihì sahá ña yatá ta nanduú ñayivi saá nacaja Ndióxi.

¹⁸Ta tóco ndihi ña yóho cúu á ña cája Ndióxi jáchi najándique táhan máni á mí xihín mé á sahá ña ñacaja Jesucristo. Ta najándacoo a chuun yóho nuú nde ña ná jándique táhan máni nde tóco ndihi ñayivi xihín mé á.

¹⁹Ta nasahan ñamani nuú ñayivi ndique táhan máni ná xihín á sahá ña ñacaja Jesucristo. Ta coó ñaquehe Ndióxi cuéntá sahá cuachi ñacaja na. Ta ña yóho cúu chuun natahnda nuú nde ñacaja Ndióxi ña ná caxi tuhun nde nuú ñayivi ña cúni mé á ndique táhan máni á xihín ná. ²⁰Mé nde cúu nde ña nachindahá Jesucristo ta xíca nde cáhan nde saha mé á. Ta viti cúu á tátuhun xíca tahví Ndióxi nu ndo tá cáhan mé nde. Ta viti xíca tahví nde nu ndó saha Jesucristo ña ná ndique táhan máni ndó xihín mé á. ²¹Mé Jesucristo coó ñacaja ni in cuachi joo sahá mí ñacaja Ndióxi ña ná ndoho Jesucristo tátuhun in ña ñacaja cuachi. Ta sahá ña ñacaja mé á co quéhe ga Ndióxi cuéntá sahá cuachi ñacaja í ta nanduú ñayivi ndaa nu mé á tátuhun cúni mé á.

6 Tasahá ña in cúu ndó xihín nde cája chúun yó cuéntá Ndióxi sahá ña cán quéa xíca tahví nde nu ndo ña ná a quéhe núu ndó ñamani cája Ndióxi xihín ndo. ²Jáchi já cáchí tuhun Ndióxi já:

Tá natandaa tiempo caja i ñamani xuhun já naxini johó i nuú ñacahun.

Ta tá naxinu quivi jácacu u yohó já nachindeé e yohó, cáchí tuhun Ndióxi.

Candehé vaha ndó. Viti ñúhú cúni Ndióxi caja cuahá ñamani xihín ndo. Ta viti ñúhú cúni a jácacu a ndohó.

³Ta ni in túhún ña núu co cája nde já ná a cáhan núu ñayivi sahá chuun cája nde. ⁴Ña cája nde quéa jánahá nde nuú ñayivi níi tiempo ña cúu nde ña cája chúun cuéntá Ndióxi. Jáchi sahan ndeé ini nde tá ndóho ini nde. Ta tá ndímaní ñaha nuú nde ta tá vaxi tondóhó nuú nde co ndíhi ini nde. ⁵Jáchi ñacani na ndehe ta nataán ná ndehe vecaa ta ndívaa na xoo nde. Ta a juú quiahva najácaja chúun na ndehe ta java tañu co quíji nde ta java tañu vaxi joco nuú nde. ⁶Joo jánahá nde nuú ñayivi ña cúu nde ñayivi cuéntá Ndióxi jáchi ndúu víi nde ta cándaa ini nde ña ndaa ta íin cáhnu ini nde xihín ñayivi ta cúu nde ña vaha ini. Ta sahá ña ndácaan ínima yíi Ndióxi ini nde ta sahá ña quíhvi ini ndusa nde ndohó ⁷ta sahá ña cáhan nde ña ndaa xihín ndeé nasahan mé á nuú nde sahá ña cán jánahá nde nuú ñayivi ña cája chúun nde cuéntá mé á. Ta sahá ña cúu nde ñayivi ndaa nu Ndióxi sahá ña cán quéa quíhvi nuu nde cáni táhan nde xihín rí quini tá cúni rí caja xíxi rí xihín nde. ⁸Java tañu cája cáhnu ñayivi ndehe ta java tañu cáhan ihvi ña xihín nde. Java tañu cáhan vaha na sahá nde ta java tañu cáhan núu na sahá nde. Ta java tañu tá quiahva cája na xihín na túhún quiahva já cája na xihín nde vatí cáhan nde ña ndaa. ⁹Ta java tañu

cája na tátuhun co xíní na ndehe vatí xíní vaha na ndehe. Ta mé a ndaa cúu nde tátuhun na sa xíhi vatí tácu yíi va nde. Cája xíxi na xihín nde joo co sáhní na ndehe. ¹⁰Ta java tañu ndúu cuéha ini nde joo níi tiempo cájii ini nde. Ta java tañu cándáhví ndivaha nde joo já cuahá ndivaha na cúu ná tátuhun na cuicá viti jáchi nacaxi tuhun nde tuhun Ndióxi nu ná. Ta ndaa nde tátuhun na coó ñaha nuu joo íin ndihi ñaha cuéntá Ndióxi nuú nde.

¹¹Ñani mí i, na ndúu ñuu Corinto jan. Tá cáhan nde xihín ndo co chíjehé tuhun nde nu ndo jáchi quíhvi ini nde ndohó xihín ndinuhu ini nde. ¹²Vatí co quíhvi ini ndó ndehe tá quiahva quíhvi ini nde ndohó joo co jándacoo nde ña quíhvi ini nde ndohó. ¹³Sahá ña cán queá xíca tahví i nu ndo tá quiahva cája in dataa tá xíca tahví da nuú jahyi da. Ña cúni queá ña ná quíhvi vaha ini ndó yehe tá quiahva quíhvi ndivaha ini i ndohó.

Co ndítahan quíhvi nuu na cúu cuéntá Jesús xihín ñayivi cuéntá ñuyiví

¹⁴Cuéntá coo ndó ná a ndíque táhan ndó xihín na co cúu cuéntá Jesús jáchi coó in cúu na xihín ndo. Jáchi ndaja cuu ndique táhan ña vaha xihín ña núu. Ta ndaja cuu ndique táhan ña yehe xihín ña naá. Ni in ña yóho a cúu coo já. ¹⁵Ta ama cuéhé Jesucristo coo a xihín Satanás, mé rí quini. Ta quiahva já ama ná cuu ndique táhan in na ndíco íchi cuéntá Jesús xihín in na co cúu cuéntá mé á. ¹⁶Ta ama ná cuu cachi ndó ña in cuu nu cája cáhnu na Ndióxi xihín nu cája cáhnu na yoco. Jáchi mí cúu yó tátuhun veñuhu Ndióxi, mé á tácu indiví. Ta já nacachi a já:

Ndacaan i ínima na cúu cuéntá mé i ta caca nuu i xihín ná.

Yehe cacuu u Ndióxi ña caja cáhnu na,

ta mé ná cacuu na ñayivi, na cacomí i cuéntá saha, cáchí Ndióxi.

¹⁷Sahá ña cán queá já nacachi Ndióxi, xitoho í já xihín ná:

Tavá ndo mé ndó tañu ñayivi quini jan.

Caxoo ndó nu ná ta a cája ndó ña núu ña cája na já ná cuu ndiquehe vaha i ndohó.

¹⁸Ta já yehe cacuu u tátá ndo,

ta mé ndó cacuu jahyi taa i xihín jahyi jíhi i, cáchí Ndióxi, mé a cúu cája tóco ndihi ñaha.

7 Candehé ndó ñani máni, na cúu cuéntá Jesús. Ña yóho cúu tuhun nasahan Ndióxi nu yo. Sahá ña cán queá co ndítahan nu yo caja í in ña núu ña cuu jácaquini yiquí cuñu í á ínima yo. Ña ndítahan caja í queá cayíhví yo Ndióxi ta cacu iní ndaja víi yo mí já ndiquiahva í mí ndáha mé á.

Cájii ini Pablo jáchi nandicó coo ini na ndúu ñuu Corinto

²Xíca tahví nde nu ndo ña ná a cáji nuu ga ndó nu ínima ndo ta ná quíhvi ini ndó ndehe. Jáchi ni in ndó coó nacaja xíxi nde xihín ta ni in ndó

coó najátiví nde ta ni in ndó coó najándahvi nde. ³Co cáhan i ña yóho xihín ndo sahá ña cúní candehe ndaa i ndohó, vaha. Jáchí janda jhna va nacachi i xihín ndo ña ñúhu ndó ínima i. Ta vaha ri catacu u ta vaha ri quivi i joo quihví ini tá quihví ini i ndohó. ⁴Mé a ndaa cándéé cáhnu ndivaha ini i ndohó ta cájii ini i xihín ña cája ndó. Ta tá ndícuhun ini i saha ndo já ndíndacú ini i ta ndícutú ndaa ini i xihín ña cájii ini i vatí ndóho ini i.

⁵Janda naní naxinu nde estado Macedonia chí a cuú canduu vaha nde jáchi ndáchí nacuu ndáca náha tondóho nuú nde. Jáchí ndijáá quixi ñaha jáquihví ndehe janda quiahva yíhví nde ndúu nde yóho. ⁶Joo sahan Ndióxi tuhun ndeé ini ñayivi ndúu cuéha ini. Na cán quéa nasahan tuhun ndeé ini nde jáchi naxinu Tito nu ndúu nde yóho. ⁷Ta a juú sahá ña naxinu da yóho cuití va, vaha. Nandihvi tuhun ndeé ini nde jáchi nacajii ndivaha ini mé dá nacaja ndóho. Ta nandicani da nuú nde ña xíca ndivaha ini ndó cuni ndó ndehe ta anda quiahva táhnda ini ndó sahá nde. Ta nacachi da xihín i ndá quiahva ndícani ini ndó sahá i ta xihín ña yóho nacajii chága ví ini i.

⁸Vatí nacacuéha ini ndó xihín carta nacahyí i nu ndo joo viti co táhnda toho ini i ña nachindahá i ña nu ndo. Vatí natahnda ini i tá naxini i ña nacacuéha ini ndó tixi chá tiempo ⁹joo cájii ini i viti. Co cúu á sahá ña nacaja cuéha carta cán ndohó. Cájii ini i jáchi tóco ndihi ña nacaja cuéha ini ndó cán nanducú ñehe a ndohó nu Ndióxi. Mé ndó nacaja ndeé ini ndó tá quiahva cúní Ndióxi. Sahá ña cán quéa cándaa ini nde ña coó nacaja núu nde xihín ndo. ¹⁰Jáchí tá cácuéha ini ta tá cája ndeé ini tá quiahva cúní Ndióxi caja í já quéa chindeé a mí ndicó coo iní. Ta xihín ña yóho jácacu a mí ta coó ñaha ndítahan táhnda iní saha. Joo tá cácuéha ini ñayivi ñuyíví co ndicó coo ini na sahá ña cán quéa ndihi saha ná indayá. ¹¹Cándéhe ndó ndaja nacaja ndeé ini ndó tá nacacuéha ini ndó tá quiahva cúní Ndióxi. Joo tá coó ña yóho ná yaha ta a jándacoo toho ndó cuachi nasacaja ndó, nduu. Joo viti a juú quiahva naxojo ini ndó saha mé cuachi ta nayíhví ndo sahá. Ta tá nandihí já naxíca ini ndó cuni ndó yehe ña ná chindeé e ndohó. Ta anda já nasahíin tiaha ndó jándoho ndó ini da nacaja cuachi cán. Ta xihín ña yóho náha ña co táhan ini ndó xihín cuachi nacaja da cán. ¹²Na cán quéa tá nacahyí i carta cán nu ndo coó nacaja i ña sahá da nacaja cuachi cán. Ta ni coó nacaja i ña sahá ñayivi nandoho ini sahá cuachi nacaja da. Nacahyí i ña jáchi xihín ña yóho cuu jánaha ndó nu Ndióxi ndá quiahva quíhví ini ndó ndehe. ¹³Ta ña yóho quéa sahan tuhun ndeé ini nde.

Joo nandindeé chága ví ini nde ta nacajii iní nde tá naxini nde ña cájii ini Tito. Jáchí mé ndó nachindeé ndó da ña ná ndivaha ini da. ¹⁴Jáchí mí i sa nacachi i xihín Tito ña cájii ini i xihín ña cája ndó ta coó nacandoo núu

i nu Tito xihín ña nacachi i xihín dá saha ndo. Joho nacandoo vaha joho i nu dá jáchi tá quiahva cáhan nde ña ndaa xihín ndo quiahva já nacahan ndaa nde xihín mé dá. Ta ña cáchi nde quéa cájii ini nde xihín ña cája ndó. ¹⁵Ta cásahá quíhvi ini chága da ndohó tá ndícuñun ini da ña nacaja ndó ña cúni mé dá. Ta nasahin toní ñúhú ndó xihín dá ta nandiquehe ndó da xihín ndinuhu ini ndó. ¹⁶Ta cájii ndivaha ini i jáchi cuu candeé ini i ndohó sahá ña cája vaha ndó.

Játaca na jiuhún quiahva na nuú na ndahví

8 Ta viti cúni nde ndicani nde nu ndóhó, ñani i ndá quiahva cája Ndióxi ñamaní xihín na cúu cuéntá Jesús ndúu estado Macedonia. ²Vatí a juú quiahva cuahá tondóhó quíxi nu ná joo cájii tá cájii ndivaha ini na. Ta vatí cúu ná ñayivi cándáhví ndivaha joo íin vaha ndivaha ini na jóco ná jiuhún tátuhun na cuicá. ³Cáhan ndaa i nu ndo ña cájii ini na jásá na ña íin nu ná ta janda java na coó cuahá nu ná sáhndá java na ña. ⁴Ta xihín ndinuhu ini na naxica tahví na nuú nde ña ná quiahva nde ñamaní nu ná ñehe táhvi ná chindeé na na cúu cuéntá Jesús ndúu Jerusalén. ⁵Chí nayaha quiahva najasá na ñaha na chí coó nacahan nde caja na já. Jáchi jihna ñúhú nandiquiahva na mé ná ndáha Ndióxi, xitoho í ña ná caja na ña cúni mé á. Anda já nandiquiahva na mé ná ndáha mé nde ná chindeé na ndehe. ⁶Sahá ña cán quéa naxica tahví nde nu Tito ña ná saa tucu da nu ndó jan já ná jáxinu coo da nuú chuun nacasáhá cája da jihna ña játaca da ña jóco maní uun ndó. ⁷Jáchi mé ndó yójó joho ndó nu ndíhi ña cája ndó. Yójó ndó xihín ña candeé ini ndó Ndióxi. Ta yójó ndó xihín tuhun cáhan ndo cuéntá Ndióxi. Ta yójó ndó xihín ña xini ndo. Ta yójó ndó xihín ña ndíhi ini ndó cája ndó ña vaha xihín ñayivi. Ta quiahva já yójó ndó xihín ña quíhvi ini ndó ndehe. Ta quiahva já ndítahan cayojó ndo nuú ña jásá ndo nuú na ndahví.

⁸Ña cáhan i xihín ndo yóho coo cúu á in chuun sáhndá i nu ndo. Ña cúni quéa ná candaá ini ndó ndá quiahva chindeé na cán ñayivi xihín ndinuhu ini na. Ta tá cája ndó tá quiahva cája na cán já quéa jánaha ndó ña mé a ndaa quíhvi ini ndó ñayivi. ⁹Jáchi sa candaá vaha ini ndó ña natahvi ini Jesucristo, xitoho í saha yo. Ta vatí nasacomí a tóco ndíhi ñaha joo najándacoo a ña ta nandaja ndáhví a mé á ña ná cuu nduu ndó tátuhun na cuicá ndivaha. Ta nacaja mé á ña yóho jáchi quíhvi ndivaha ini a ndohó.

¹⁰Cája i cuéntá ña vaha chága ná jáxinu coo ndó ña nacasáhá cája ndó ava. Jáchi jihna ñúhú mé ndó nacasáhá ndó játaca ndó jiuhún jan ta nacaja ndó ña xihín ndinuhu ini ndó. ¹¹Candehé ndo. Xíní ñúhú jáxinu coo ndó ña nacasáhá cája ndó jan. Ta ná caja ndó ña xihín ndinuhu ini ndó tá quiahva nacaja ndó janda tá mé saha. Ta xíní ñúhú quiahva ndó ña cuu

jasá ndo ¹²jáchí ndá nā cúni jasá ñaha já ndíquehe vaha Ndióxi ndá ña cuu jasá nā. Sahá ña cán quéa xíní ñúhú quiahva ndó ña cuu quiahva ndó jáchi co xíca Ndióxi nu yo quiahva í ña co cómi yo.

¹³A cáhan ndo ña co ndítahan nuú nā cán caja chúun na nani cája chúun mé ndó ña ná chindeé ndó nā. ¹⁴Ña cúni Ndióxi quéa ná a ndímaní ni in ñaha nu táhan ndó. Jáchi ña ndímaní nuú nā cán, íin cuahá nu ndóhó viti ña ná cuu chindeé ndó nā. Joo inga tañu ña ndímaní nu ndóhó, coo a nuú nā cán ta já cuu chindeé nā cán ndohó. Ta quiahva já canduu in nuú xihín táhan ndó. ¹⁵Já cáchi tuhun Ndióxi já: “Ni cóo nacayojó a nuú nā najátaca cuahá. Ta ni cóo nandimaní á nuú nā najátaca chá ña.”

Tito xihín nā xíca xihín dá

¹⁶Ndíquiahva i ndixahvi nu Ndióxi jáchi nacaja mé á ña ná ndíhi ini Tito saha ndo tá quiahva ndíhi ini mí i saha ndo. ¹⁷Jáchí nacandúsa da caja da ña nasahnda i nu dá. Ta sa ndícani ini ri mé dá saha ndo ta sahá ña cán quéa cúni da coto nihni da ndohó cuéntá mé dá viti.

¹⁸Ta chindahá i in dataa, da cúu cuéntá Jesús saa da xihín Tito jan. Ta tóco ndíhi ñayivi ndúu java ga veñuhu cáhan vaha na sahá da cán ta sahá ña cája chúun vaha da cáxi tuhun da tuhun vaha saha Jesús nuú ñayivi. ¹⁹Ta mé nā cúu cuéntá Jesús, nā táca ndijáa veñuhu yóho nandacaxi na da ña ná caca da xihín nde cañehe nde jiuhún cuhun nde ñuu Jerusalén. Ta tá cája nde ñamaní xihín ñayivi cán já quéa jánaha nde ña mé a ndaa táhyí cúni nde chindeé nde nā. Ta xihín ña yóho cája cáhnu nde Ndióxi. ²⁰Jáchí co cúni nde ña ná cahan núu ñayivi sahá ña cája nde xihín jiuhún cuaha cán, ña najátaca ndó. ²¹Sahá ña cán quéa ndíhi ini nde cája nde ña vaha. Ta a juú nu Ndióxi cuití va ndíhi ini nde cája nde ña vaha jáchi cúni nde caja nde ña vaha nuú ñayivi viti.

²²Ta xihín mé ñaní, da chindahá i nu ndó jan chindahá i inga tucu da cúu cuéntá Jesús. Mé da yóho cuahá ndivaha tañu nanaha da ña íin ini da caja da ña vaha xihín ñayivi. Ta viti xíca chága ini da caja da ña jáchi cándeé ini da ña a jándacoo núu ndó da. ²³Ta ndá nā ná ndaca tuhún ndohó saha Tito ndítahan cahan ndó xihín ná ña cúu dá da xíca xihín mí i. Ta cahan ndó ña in nuú cája chúun da xihín i chindeé nde ndohó. Ta tá ná ndaca tuhún nā ndohó sahá java ga nā cúu cuéntá Jesús cuahan xihín dá ndítahan cahan ndó ña cúu ná nā nachindahá nā cúu cuéntá Jesús táca veñuhu chóho. Ta cahan ndó xihín ná ña cúu ná nā cája cáhnu Jesucristo. ²⁴Ta xíní ñúhú jánaha ndó nuú nā cán ña mé a ndaa táhyí quíhvi ini ndó nā já ná candaa ini nā táca veñuhu cán ña íin sahá nde cáji ini nde xihín ndo.

Sa nataca jiuhún cūhun nuú na cúu cuéntá Jesús

9 Co xíní ñúhú cahyí chága i nu ndo sahá jiuhún ña játacá ndó chindeé ndó na cúu cuéntá Jesús ñuu Jerusalén. ²Jáchí sa xíní vi ña íin vaha ini ndó caja ndó ña. Ta ndivaha ini i tá cáxi tūhun i nuú na ndúu estado Macedonia ña mé ndó, na ndúu estado Acaya jan nasacu ini ndó chindeé ndó ñayivi janda ava. Ta cuahá na ndúu estado Macedonia nandindeé ini na chindeé na ñayivi sahá ña vaha ini mé ndó. ³Joo chindahá i na cúu cuéntá Jesús yóho nu ndo já queá ná a cándo nuú i jáchí nacahan vaha i saha ndo nuú na yóho. Ta ña cúní queá ña ná coo tiahvā ndó ndiquiahva ndó jiuhún ña najátaca ndó jan tá quiahva nacachi i xihín ná. ⁴Jáchí tiahvā náá java na ndúu estado Macedonia saa na xihín i ta cuni na ña co ndúu tiahvā ndó xihín mé jiuhún. Tá ná yaha ña yóho ta já cacahan ndivaha nuú nde caja ndó xihín ña jan sahá ña nasandee cáhnu ini i ndohó ta sa mé quiahva já cacahan ri nuu ndóhó va. ⁵Ta saha mé ña jan queá nacahán i ña xíní ñúhú caca i ñamaní nuú na cúu cuéntá Jesús yóho ña ná cūhun na coto nihni jihna ñúhú na ndohó. Ta já ná chindeé na ndohó nu játaca ndó jiuhún ña nasahan ndó tūhun ndó quiahva ndó jan. Já queá ná coo tiahvā jiuhún cán tá ná saa i ña ná nahā ña sáhan ndó jiuhún jan sahá ña íin maní ini ndó ta co sáhan ndó ña xihín ña ndúsa.

⁶Xíní ñúhú ndicūhun ini ndó ña yóho: Da xútu loho, chá va jáquee da. Da xútu cuahā, cuahā jáquee da. ⁷Tá in tá in ndó xíní ñúhú quiahva ndó tá quiahva nasacu ini ndó quiahva ndó. A quiahva cajíhnda johō ini ndó ñaha ta ni a quiahva ndó ña xihín ña ndúsa. Jáchí quíhvi ini Ndióxi na cájii ini jasá ñaha. ⁸Ta cuu quiahva Ndióxi cuahá ndivaha nuú ña vaha nu ndó já queá ná a ndímaní ni in ñaha nu ndo. Jáchí johō cajojó johō a nu ndo já ná cuu chindeé ndó na ndímaní ñaha nuu nani ná cacuu a nuú ña vaha.

⁹Jáchí já cáchí tūhun Ndióxi já:

Cuahá ndivaha ñaha jasá Ndióxi nuú na ndahví,
ta já coo ña vaha cája mé á xihín ñayivi anda ama cáa quívi, cáchí
tūhun Ndióxi.

¹⁰Jáchí Ndióxi queá sáhan tata nuú in dataa já ná cutu da ña. Ta mé a cán sáhan ña cuxu da viti. Ta quiahva já caja Ndióxi xihín ndo. Quiahva mé á ña xíní ñúhú ndo já ná cuu chindeé chága ví ndó ñayivi. Ta já queá ñehe táhvi ndó canduu vaha ndó sahá ñamaní cája ndó. ¹¹Ta já xinu ndó cacomí ndo cuahá ndivaha nuú ña cuicá ta xihín ña yóho cuu chindeé cuahā ndó ñayivi xihín á. Ta mé jiuhún játaca ndó jan tá ndiquiahva nde ña nuú na ñuu Jerusalén já queá ndiquiahva na cán ndixahvi nu Ndióxi sahá. ¹²Jáchí mé jiuhún játaca ndó cán tá ná ndiquiahva nde ña nuú na cúu cuéntá Jesús cán já queá chindeé a na xihín ña ndímaní nu ná. Ta xihín ña yóho

ndiquiahva ndivaha na cán ndixahvi nu Ndióxi. ¹³Ta já caja cáhnu na Ndióxi jáchi xihín ña caja ndó yóho náha ña co quehe núu ndó tuhun vaha cáhan sahá Jesucristo. Jári caja cáhnu na Ndióxi sahá ña vaha íin ini ndó xihín ná. Jáchi chindeé ndó na xihín ña jása ndó nu ná ta chindeé ri ndó java ga ñayivi. ¹⁴Ta ndiquiahva na ndixahvi nu Ndióxi saha ndo jáchi xihín ña caja ndó náha cáxi a ña caja cuaha Ndióxi ñamani xihín ñayivi. ¹⁵Ndixahvi Ndióxi jáchi najasá mé á in ña cáhnu ndivaha nu yo ta ni co ñehe yó tuhun ndá quiahva ndicaní ña.

Cáhan Pablo saha mé dá

10 Yehe cúu Pablo ta cúni caca i ñamani nu ndo. Joo cúni cahan víi i ña nu ndo tá quiahva cáhan víi Jesucristo xoho. Ndúu java na tañu ndó ta cáchí na ña tá íin i tañu ndóhó já cúu u in ta uun ini. Joo cáchí na tá íin xíca i já cúu u da co yíhvi cahan ndacú xihín ndo. ²Ta viti xíca tahví i nu ndo ña ná a caja ndó ni in ñaha ña cuu jánani i ndohó saha. Tá ná saa i coto nihni i ndohó jan co cúni jánani i java ndó, na jácojo cuachi jatá nde, na cáchí ña caja nde tóco ndihi ñaha tá quiahva caja ñayivi ñuyíví. Jáchi mé a ndaa sácú ini i saa i quihvi táhan i xihín na jan. ³Vatí cúu yó ñayivi ndúu ñuyíví joo co caja nde tá quiahva caja ñayivi ñuyíví. ⁴Jáchi ña chindeé ndehe co cúu á ña chindeé ñayivi ñuyíví. Joo ña chindeé ndehe cúu ndée Ndióxi ña sahan mé á nuú nde já ná cuu jándihi nde sahá ña caja tiñahá sacua. ⁵Ta quiahva já jándihi nde sahá ña caja ihvi xihín Ndióxi ta xihín ndée mé á jándihi nde sahá ña cáhan ñayivi, na caja cáhnu mé jáchi co xini na Ndióxi. Ta tóco ndihi ña cáhvi ini nde ndiquiahva nde ña ndáha mé á já ná caja nde tóco ndihi ña cúni Jesucristo. ⁶Na cán quea tá ná náha ña íin tiahva ndó caja ndó tóco ndihi ña nasahnda nde nu ndó já quea cacu ini nde jánani nde ndá na nacuu, na co cúni caja ña sáhdá Jesucristo.

⁷Mé ndó co xini ndó ndá quiahva cáa ínima ñayivi jáchi sándehe ndó ña cáa chí jata cuití va. Joo tá mé a ndaa táhyí cáhan java ndó ña cómi Jesucristo cuénta saha ndo xini ñúhú quehe ndó cuénta ña cúu ri ndehe va na cómi Jesucristo cuénta saha. ⁸Co cáchan nuú i caja cáhnu loho i mí i sahá chuun nasahan Ndióxi nuú i. Jáchi nacaja mé á ña ná cahnda i chuun nu ndo jáchi mé Jesucristo, xitoho í nasahan chuun nuú i ña ná jácuahnu i ndohó tá quiahva cúni mé á. Ta co cúni a ña ná jándihi i saha ndo. ⁹Co cúni ña ná cáhan ndo ña jáyihví i ndohó xihín carta chindahá i nu ndo. ¹⁰Ndúu java na ta cáchí na ndacú ndivaha yuhú u cahan i nu carta cáhyí i. Joo tá íin i xihín ndo co náha i ña cúu u da jáyihví ndóhó jáchi tá casáha cáhan i xihín ndo co náha i ña cúu u da ndítahan coo toní ñúhú ñayivi xihín. ¹¹Joo na xíca cáhan ña yóho xini ñúhú candaa ini na ña tá quiahva

ndacú yuhú i tá cáhan i xihín carta tá íin xícá i quiahva já caja i tá ná xinu coo i tañu ndó jan.

¹²Mé a ndaa co sahan i ínima i jácatáhan i mí i xihín na cája cáhnu mé jan. Joo ndíá cáa mé cája na jan tá jácatáhan ndaja táhan mé va na ta xihín ña yóho náha ña tóntó ndivaha cája na. ¹³Co cája cáhnu i mí i jáchi co ndítahan nuú i caja i ña. Cáhan cuití va i sahá chuun nasahan Ndióxi nuú i caja i cuéntá mé á ta mé á quéa nachindahá yehe saa i anda nu ndúu ndó jan. ¹⁴Co cája cáhnu i mí i tá cáhan i sahá chuun nasahan Ndióxi nuú i caja i. Jáchi mé nde cúu nde na nu cuítí nasahan nacahan nde tuhun vaha saha Jesucristo nu ndo. ¹⁵Sahá ña cán quéa cándaa vaha ini ndó ña co cáhan nde sahá chuun najácava sahá inga na. Ta ni co yáha nde cája cáhnu nde mé nde sahá chuun cája nde yóho. Na cúni nde quéa ná candeé chága ini ndó Jesucristo nani caja chúun chága nde tañu ndó tá cúni Ndióxi. ¹⁶Ta cúni nde cahan nde tuhun vaha saha Jesús nuú ñayivi, na ndúu xícá chága nuú ñuu Corinto jan. Joo co cúni nde quihvi nuu nde nuú sa nacaja chúun inga na já ná a cája lándá nde sahá chuun nacaja inga na.

¹⁷Ta já cáchi tuhun Ndióxi já: “Ndá na cúni caja lándá, xíní ñúhú caja lándá na sahá ña náhnu nacaja Ndióxi xihín ná.” ¹⁸Jáchi co táhán ini Ndióxi xihín na ndíñehe jícó mé joo ndíñehe jícó Ndióxi ñayivi tá táhán ini a xihín ña cája na.

Cáhan Pablo sahá na co cúu apóstol

11 Xícá tahví i nu ndo ña ná a quéhe ndó cuéntá sahá ña cája i tá ná caja i tátuhun in taa tachi. Caja ndó ñamani xihín i. ²Ndióxi quéa nacaja ña ná quihvi ndivaha ini i ndohó sahá ña cán quéa co cúni ña ná jándacoo ndó íchi cuéntá mé á. Cája i tátuhun cája da cuínú jáchi nasacu ini i ndiquiahva vií i ndohó ndáha Jesucristo tátuhun cája in dataa ndíquiahva da jahyi jíhí da, ña cúu ña tacú ndinuhu nuú da cacuu yíi ña. ³Á co ndícuhun ini ndó ndaja nacaja tiñáhá sacuaaha tá najándahvi rí ña naní Eva sanahá. Ta viti yíhvi i ña ná jándahvi java ñayivi ndohó tá quiahva najándahvi rí mé ña. Jáchi viti candeé ini ndó Jesús ta cája cáhnu ndó mé á xihín ndinuhu ini ndó. Joo yíhvi i jándacoo ndó ña jan. ⁴Jáchi mé ndó sahan ndó ñamani ña ná saa ndá ñayivi nacuu va vatí jánaaha na ña tuhún saha Jesucristo. Co jánaaha na ndohó tá quiahva najánaaha mé nde nu ndo jáchi jíin va cáhan na saha ínima yíi Ndióxi ta jíin va cáchi na jácacu Ndióxi ñayivi. Joo nandiquehe vaha ndó na. ⁵Ta cáhán ndo ña cúu ná na apóstol, na náhnu ndivaha joo xíní vaha i ña co cúu ná na vaha chága a juú ga yehe. ⁶Vatí co tiaha i cahan vií i joo íin vaha xíní túní i jánaaha i tuhun Ndióxi nu ndo. Ta xíní vaha ndó ña yóho jáchi cuahá tañu najánaaha vaha i tuhun Ndióxi nu ndo.

⁷Java tañu cáhán i ña coó nacaja vaha i jáchi coó naquehe e yahvi nu ndo tá nacahan i tūhun Ndióxi xihín ndo. Ta java tañu cáhán i ña coó nacaja vaha i tá najánuu i mí i já ná cuu ndindita jícó ndóhó. ⁸Mé a ndaa cúú á tátuhun nacandaa johó i jiuhún nuú java na cúú cuéntá Jesús ta naquehe e yahvi i nuú na cán ña ná quixi i caja chúun i tañu mé ndo. ⁹Ta tá naxini núhú i in ñaha tá nasahin tañu ndó jan coó najáquihvi toho i ndóhó sahá ña naxini núhú i. Jáchi mé na cúú cuéntá Jesús, na naquixi Macedonia nasahan na nuú i ña naxini núhú i catacu u. Mí i coó naxeen toho i jáquihvi i ndóhó. Ta a cája toho i ña viti. ¹⁰Cáhan i ña ndaa xihín ndo jáchi iin Jesucristo xihín i. Ta ni in ñaha a cáji nuu toho nuú i cahan i ña yóho nuú na ndúu estado Acaya. ¹¹Coto a cáhán ndo ña co quíhvi ini i ndóhó sahá ña cahan i quiahva já xihín ndo. Jáchi xini vaha Ndióxi ña quíhvi ndivaha ini i ndóhó.

¹²Joo a jándacoo toho i caja i ña cája i yóho já ná a quiahva i ñamaní nuú na cán ndínehe jícó na mé ná. Jáchi cáchi na cája chúun na cuéntá Ndióxi tá quiahva cája ndehe. Joo co cúú á ña ndaa. ¹³Mé a ndaa co cúú toho na jan apóstol cuéntá Jesucristo vatí ndája na mé ná tátuhun apóstol. Ta jándahvi na ñayivi tá cáchi na ña cúú ná na apóstol. ¹⁴Joo co ndítahan catóntó yo sahá ña yóho jáchi janda Satanás, mé tiñáhá sacuahá ndája rí mé rí tátuhun in táto Ndióxi, ña yehe ndivaha. ¹⁵Ta jári na ndíco jata rí cán co yáncá toho na ndája na mé ná tátuhun ñayivi cája ña vaha. Joo vaxi quiví ndiquehe na yahvi sahá ñaha nacaja na.

Ndóho ini Pablo sahá ña cúú dá apóstol

¹⁶Ta ná cahan tucu u ña yóho xihín ndo: coto a cáhán ndo ña cúú u da nacatachi. Joo tá cáhán ndo ña cúú u da nacatachi i quiahva loho ndó ñamaní nuú i ña ná cahan i xihín ndó tátuhun in da tachi já ná cuu ndínehe jícó loho i mí i. ¹⁷Tá cahan lándá i yóho co cúú á tūhun nasahan Ndióxi nuú i. Cahan i ña tátuhun in da nacatachi cuití va. ¹⁸Ta sahá ña ndúu cuahá na catóo ndínehe jícó mé sahá ña cája na ñuyiví yóho sahá ña cán quéa ná caja ri yehe va quiahva já. ¹⁹Mé ndó cáhán ndo cúú ndó ñayivi ndíchí ndivaha jini joo cáji ini ndó táa johó ndó nu cahan ñayivi tachi cán xihín ndo. ²⁰Ta ni co sáhní ndo mé ndó tá cája ndúsa na cán xihín ndo caja ndíví ndó nu ná vatí quéhe na ñaha cómi ndo. Ta jándahvi na ndóhó ta quéhe núu na ndóhó janda cáni na jahnda nuu ndo. ²¹Á cáhán ndo ña ndítahan cacahan nuú i sahá ña coó nasahan ndeé toho ini nde caja nde tá quiahva cája na jan xihín ndo.

Joo tá co sáhní na jan mé ná cája lándá na, caja ri yehe va já vatí cahan i ña yóho tátuhun in da tachi. ²²Ta tá cahan lándá na jan ña cúú ná na hebreo, mé a ndaa da hebreo cúú ri yehe va. Ta tá cahan lándá na jan ña

cúu ná na Israel, mé a ndaa da Israel cúu ri yehe va. Ta tá cáhan lánda na jan ña naquixi na chichi Abraham, mé a ndaa da naquixi chichi Abraham cúu ri yehe va. ²³Ta tá cáhan lánda na jan ña cúu ná na cája chúun cuénta Jesucristo, mé a ndaa yehe cúu da cája chúun chága cuénta mé á. Vatí cáhan i tátuhun in da tachí joo mé a ndaa cuaha chága cája chúun yehe a juú ga na jan. Cuaha chága tañu nachicaan na yehe vecaa a juú ga na jan. Ta cuaha chága tañu nacaja xixi na xihín yehe a juú ga na jan. Ta cuahá ndivaha tañu sa yáti quivi i a juú ga na jan. ²⁴Ta uhun tañu najácaxáhan na Israel yehe xihín churú. Ta in tá in táhnda cán najáxinu na churú jatá i oco sahun comi tañu. ²⁵Ta uni tañu najácaxáhan na yehe xihín vara ta in tañu nacati na nacuun na yuú yehe. Ta sa uni tañu nasacoo barco, mé dó cuahan i cán cahá tañuhú. Ta nasanúu i nuú tañuhú in ñuú ta in ndiví. ²⁶Ta ndóho ndivaha ini i nu xíca nuu i jáchi cuahá tañu ndúcú tani i xihín yuta. Ta janda ta cuíhna a íhvi queta nuú i. Ta naxica iyo i tañu na ñuu i xihín tañu na tóho. Ta tá íin i ñuu náhnu á íin i yucu á íin i tañuhú já vaxi tá vaxi tondóho nuú i. Ta janda tañu na cáchi cúu cuénta Jesús vatí co cúu na naquixi tondóho nuú i. ²⁷Ta cánaa i cája chúun i janda ndíhíhvi ndivaha i. Ta cuahá tañu co quíji vaha i. Ta cuahá tañu naquixi joco nuú i ta naquixi ña íchi ini i ticuí ta janda ínima uun i íin i jáchi co ñéhe e ña cuxu u. Ta cuahá tañu ndóho ini i sahá ña vixi xíní i jáchi coó jáhma candixi i.

²⁸Ta vatí ndóho i ña yóho xihín java ga ñaha joo ndícani tá ndícani ini i saha tóco ndihi na cúu cuénta Jesús, na táca ndijáa veñuhu. ²⁹Jáchi tá cuítá ini ñayivi já cúu á tátuhun cuítá ri ini yehe va xihín ná. Ta tá ndícava in na nuú cuachi cája inga na já quea xójo ndivaha ini i xihín na najándicava ñahá cán. ³⁰Ta tá íin in ñaha ña cuu cahán lánda i saha já ná cahán lánda i sahá ña náha ña coó cuahá ndée mí i. ³¹Ta Ndióxi, tátá Jesucristo, xitoho í, mé a ndítahan caja cáhnu í anda ama cáa quivi xíní vaha ña cáhan i ña ndaa xihín ndo. ³²Jáchi in tañu nasahiin i ñuu Damasco ta ndaja coo da cúu gobernador, da nacaja chúun nu rey Aretas nasahnda da chuun ña ná chicaji na yéhe ñuu cán já ná cuu tiin na yehe. ³³Joo java na cúu cuénta Jesús najánuu na yehe ini in toyicá chí ventana mé corra yuu ndájí ñuu cán já nacuu najácacu na yehe.

Ña naxini Pablo nacaja Ndióxi

12 Ni in ñaha co ñéhe e tá ndínehe jícó i mí i. Joo já ndítahan nuú i ndicani i nu ndo sahá ña naxini i cuénta indiví, ña najánaha Ndióxi nuú i ta sahá ña nacachi mé á xihín i coo. ²Sa íin uxu comí cuia nayaha ña yóho. Najándaa Ndióxi yehe, da cándeé ini i Jesucristo nasahan i indiví uni nu íin mé á. Co xíní yehe á nandaa yiquí cuñu i xihín i á nacando a

ñuyíví yóho. In túhún Ndióxi xíni. ³Joo xíni vaha i ña yehe cúu da nasahan cán vatí co xíni i á nandaa yiquí cuñu i á nacandoo a ñuyíví yóho. Ndióxi cuití va xíni. ⁴Joo xíni vaha i ña nasahan i nu ndató ndivaha indiví. Ta mé cán naxini johó i tuhun, ña co ndíñehé e ndaja ndicani i ña nuú ñayivi ta ni co sahan Ndióxi ñamaní nuú i ndicani i ña nu ná. ⁵Cuu ndíñehé jícó i mí i sahá ña naxini i yóho joo a cája toho i ña. Vaha chága ná caja lándá i sahá ña coó toho ndée mí i. ⁶Ta tá ná cacu ini i ndíñehé jícó i mí i já quea a cacuu toho i da tachí jáchi ña ndaa táhyí cacuu tuhun cahan i. Joo co cája toho i ña jáchi cúni ña ná cahan ñayivi ña ndaa cuití va sahá i ta sahá ña nacaja i xihín sahá ña nacahan i.

⁷Ta sahá ña co cúni Ndióxi ña ná caja cáhnu i mí i sahá ña naxini i sahá ña cán quea naquixi in ña ndóho i. Cúu á tátuhun in íñu sa cáñee nuú yiquí cuñu i xíni i, ña quixi nuú tiñáhá sacuahá cája xíxi rí xihín i já ná a cája cáhnu i mí i. ⁸Ta sa uní tañu naxica tahví i nu Ndióxi, xitoho í ña ná tavá a ña ndóho i yóho. ⁹Joo nanducú ñehé mé á tuhun nuú i já nacachi a já: “Sa quiahva cúu mé a quíhvi ini i yohó jan va jáchi ña cúu cája i xihín ñayivi náha cáxi chága tá co ndée ná”, nacachi Ndióxi. Ña cán quea cájii ini i cúu u in da cámaní ndée já quea náha ña xihín ndée Jesucristo cája i tóco ndihi ñaha. ¹⁰Sahá ña quíhvi ini i Jesucristo, cájii tá cájii ini i tá cávitá ini i, á tá cánahá na xihín i, á tá cámaní ñaha nuú i, á tá ndúcú na yehe ña caja xíxi na xihín i. Jáchi tá cávitá ini i já ndíndacú chága i xihín ndée Ndióxi.

Ndicani ini Pablo sahá na cúu cuéntá Jesús ndúu ñuu Corinto

¹¹Tá quiahva cája da tachí já cája i joo ndóhó cúu na nacaja ndúsa xihín i caja i ña. Jáchi mé ndó cúu na ndítahan cahan vaha sahá i, nduu. Joo já coó toho chága sahá na cáhan ndó cúu apóstol jan a juú ga yehe vatí mé a ndaa nu Ndióxi coó saha toho i. ¹²Jáchi xihín ña náhnu nacaja i nu ndo jan ta xihín ña xituhún naxini ndó nacaja i jan najánaha i nu ndo ña mé a ndaa táhyí cúu u in apóstol. Coó nandíhi ini i tá nacaja i ña xituhún jan nu ndo. ¹³Ta tá quiahva nacaja i xihín java ga na cúu cuéntá Jesús quiahva já nacaja ri xihín ndóhó va. In túhún ña coó nacaja i xihín ndó quea coó najáquihvi toho i ndohó sahá ña xíní ñúhú i catacu u tá quiahva nacaja i xihín java ga na cúu cuéntá Jesús. Á cáhan ndo ña vaha chága ná caja ndúsa i xihín ndó quiahva ndó nuú i ña xíní ñúhú i.

¹⁴Ta viti sa íin tiaha i saa i coto nihni i ndohó ña chí uní. Ta ni viti a jáquihvi toho i ndohó jáchi co xíca toho ini i quehe e ña cómi ndo. Ña cúni quea ná quíhvi ini ndó yehe tá quiahva quíhvi ini i ndohó. Jáchi mé ndó cúu ndó tátuhun jahyi i sahá ña najánaha i tuhun Ndióxi nu ndo. Ta ndá nacuu na valí co xíto na tátá na joo mé tátá na cúu na xíto mé na valí.

¹⁵Ta cájii ini i jándihi i tóco ndihi ñaha cómi i já ná chindeé e ndohó. Ta janda ndiquiahva i mí i já ná cacu ndaa ínima ndo. Cája i cuéntá tá quíhvi chága ini i ndohó já co cúu chága ini ndó xihín i.

¹⁶Mé a ndaa coó najáquihvi toho i ndohó. Joo ndúu java na tañu ndó ta cáchí na ña nacaja ndúsa i xihín ndo já najándahvi tá najándahvi i ndohó.

¹⁷Á cáhán ndó ña najándahvi i ndohó tá nachindahá i java ñayivi nu ndo jan. A juú a já. ¹⁸Jáchí naxica tahví i nu Tito ña ná saa da coto nihni da ndohó jan. Ta nachindahá i inga da cúu cuéntá Jesús xihín dá. Á najándahvi da ndohó, vaha. Sa xíní vaha i ña coó najándahvi da ndohó. Ta tá quiahva cája Tito quiahva já cája ri yehe va jáchí in ínima ñéhe nde xihín dá.

¹⁹Á cáhán ndo ña sa nacasáhá cáhan chíjín tucu nde xihín ndo viti. Co cúu á já. Jáchí sándehe cáxí Ndióxi ña cáhan nde ña yóho xihín ndo tá quiahva cúni Jesucristo. Ta cája nde tóco ndihi ña yóho jáchí quíhvi ini nde ndohó ta cúni nde ña ná cuahnu chága ndó xihín tuhun Ndióxi.

²⁰Yíhvi i jáchí tá ná saa i coto nihni i ndohó co cúni i ndiñehé e ndohó cája ndó ña núu, ña co cátóo i. Ta sa mé quiahva já yíhvi i ña cuni ndó yehe caja i ña co cátóo ndo. Yíhvi i jáchí tiaha náá cani táhan ndó, á cahíhvi ini xihín táhan ndó, á cojo ini xihín táhan ndó, á ndacahnda táhan ndó, á cahán ndó ña tuhún sahá ñani táhan ndó, á candehe ndaa táhan ndó, á ndiñehe jícó ndo mé ndó, á sa jíin sa jíin cája in in ndó. ²¹Ta yíhvi i ña tá ná saa i coto nihni i ndohó jan caja Ndióxi ña ná cacahan nuú i saha tóco ndihi ña cája ndó jan. Ta yíhvi i cuacu u sahá cuahá na cája cuachi, na sa janda jihna nacasáhá cája cuachi ña a ñaha jándacoo na cája na xihín yiquí cuñu na. Ta cuacu u jáchí a ñaha jándacoo na ña ndúu na xihín na co cúu ñájíhí na á yíi ná. Ta ni a ñaha jándacoo na tóco ndihi ña núu, ña xíca ini yiquí cuñu na caja.

Jáxinu coo Pablo tuhun cáhan da xihín na ñuu Corinto

13 Taxihín ña yóho xinu uni táhnda saa i coto nihni i ndohó. Ta xíní ñúhú ndicuhun ini ndó ña sáhnda tuhun Ndióxi chuun nu yo ta cáchí a ña tá ná cáhan ivi á uni testigo sahá cuachi nacaja in ñayivi anda jáví candaa ini ndó ña mé a ndaa íin cuachi na. ²Tá quiahva nacahan i xihín ndo tá naxito nihni i ndohó ña chí ivi quiahva já cáhan i xihín ndo viti vatí íin xíca i. Ta tá quiahva nacahan i xihín na nacaja cuachi jihna jan quiahva já cáhan i xihín ndihi ndó viti. Ta tá ná casaa tucu u coto nihni i ndohó jan já quéa a táhnda ga ini i saha ndo sahá cuachi cája ndó. ³Ta xihín ña yóho candaa ini ndó ña mé a ndaa táhyí cáhan i ña sáhnda Jesucristo cahán i. Cúni ña ná candaa ini ndó ña co cáhan chíjín toho Jesucristo xihín ndo. Ña cája mé á xihín ndo quéa náha nu ndo ña íin ndée

mé á cája ña cúní a. ⁴Mé Jesucristo quéa nacata caa na ndíca crúxu tátuhun in da co ndée. Joo viti tácu mé á saha ndée Ndióxi. Ta tá quiahva vitá nasahiin yiquí cuñu a quiahva já vitá ndúu yó viti. Joo sahá ña in nanduú xihín mé á já cuu catacú xihín ndée a. Ta xihín ña yóho cája chúun nde tañu mé ndó.

⁵Xíní ñúhú candehé vaha ndó mé ndó á mé a ndaa táhyí cándée cáhnu ini ndó Ndióxi. Xíní ñúhú coto ndojó ndó mé ndó. Ta tá mé a ndaa táhyí cúu ndó cuéntá Jesús xíní ñúhú ndicuhun ini ndó ña ndácaan Jesucristo ini ínima ndo á tá coó yúhu uun va ndó cúu ndó cuéntá Jesús. ⁶Ta ndátí i xinu quiví candaa ini ndó ña coó najándahvi nde ndohó. ⁷Xíca tahví nde nu Ndióxi ña ná a cája ndó ni in ña núu. Ta co cúu á sahá ña cúní nde cahan vaha ñayivi sahá nde, vaha. Ña cúní nde quéa ná a jándacoo ndó caja ndó ña vaha vatí ná cahan ñayivi ña coó nacaja vaha nde xihín ña najánaaha nde nu ndo. ⁸Co xíní ñúhú nde jánani nde ndohó nani cája ndó ña ndaa joo tá cája ndó ña núu já quéa xíní ñúhú jánani nde ndohó. ⁹Ta cájii ini nde tá ndaa nde tá quiahva ndaa na vitá ini tá cúu á sahá ña ndacú ini mé ndó cuéntá Ndióxi. Ta a jándacoo toho nde caca tahví nde nu Ndióxi saha ndo ña ná xinu coo ndó cacuu ndó ñayivi coó cuachi nu mé á. ¹⁰Jihna ñúhú cáhyí i carta yóho nu ndo já saa i coto nihni tucu u ndohó. Jáchí tá ná saa i jan co cúní cahan ihvi nahá i xihín ndo vatí nasahan Ndióxi chuun yóho nuú i. Ta coó nasahan mé á ña nuú i ña ná jándihi i saha ndo. Nasahan mé á chuun yóho nuú i já ná cuu ndaja ndacú u ndohó cuéntá mé á.

¹¹Candehé ndo, ñani i, na cúu cuéntá Jesús. Xihín tuhun yóho jáxinu coo i tuhun cahan i xihín ndo. Ná coo Ndióxi xihín ndó. Ta ná ndindacú chága ndó já ná nduu ndó ñayivi ndaa. Ta quiahva tuhun ndée ini táhan ndó. Co vaha ndó xihín ñani táhan ndó já quéa coo Ndióxi xihín ndo. Mé a cán quíhvi ini a ndohó ta cúní a ña ná coo vaha ini ndó. ¹²Caahan Ndióxi xihín táhan ndó ta tatí yúhu táhan ndó ta yii caja ndó ña. ¹³Tóco ndihi na cúu cuéntá Jesús chindahá na Ndióxi coo ndó.

¹⁴Ná tahví ini Jesucristo, xitoho í saha ndo jáchí quíhvi ini Ndióxi ndohó. Ta ná coo tuun ínima yii mé á xihín ndo. Ña yóho quéa cúní ña ná caja Ndióxi xihín ndo. Já ná coo.